

FORUM

Flurs e flurs – ed aunc bia auter



Lucia Alpiger en siu atelier.

FOTO MAD

Silmeins ina gada ad onn envida la gruppa d'interess «da cuminsonza a Ruschein – la sera dils treis» ad ina sera per tudestg. Hosp ei quella gada *Lucia Alpiger*, la possessura dil «Blumagarta». Biars enconuschan ella da sia preschientscha regulara alla fiera jamnila a Cuera u da sias «portas aviartas» la primavera, cura che sias rosas da Tschuncheismas flureschan giun Cultira sut Ruschein. Carschida si ei la dunna da prest 53 onns el Toggenburg sco otgavel affon dad ina famiglia gronda da 10. Arrivada en Surselva eis ella avon 25 onns – e quei sco educatura suletta dad ina feglia. «Buc adina sempel», manegia ella oz. Mo ella ei restada. Igl emprend ha ella luvrau en la gastronomia, sia clamada oriunda. Zacu ha ella scu-vretg sia amur e sia pissiun per las fluras. Ed oz sa ella viver da sia lavur sco flurista.

Avon che vegnir e star a Ruschein ei Lucia Alpiger viaggiada pil mund entuorn. Sia idea era buca dad ir per duas ni treis jamnas en tiaras jastras per far leu vacanzas. Ella ha vuliu

viver en tiaras lontanias e turnar en Svizra mo per luvrar e finanzia la proxima dimora egl exteriur. En California eis ella stada pli gitg perquei che la neiv leu ha plaschiu ad ella aschi bein per ir cun snowboard. En Columbia, alla Mar Caribica, nua che ella ha viviu da quei da dus onns en ina regiun zun isolada, ha ella schizun baghegiu ina casetta. Ed el Mexico, a San Miguel de Allende, eis ella s'occupada dad artisanadi.

Alla sera «da cuminsonza» a Ruschein va ei pia buca mo per fluras e per far bials matgs, mobein era per experientschas da veta, fatgas en in contuorn ed ambient jester. Envidadas e beinvegnidas alla sera «da cuminsonza a Ruschein» ein sco adina era personas d'ordeifer. L'entrada ei gratuita.

Maria Cadruvi, Ruschein

L'occorrenza «da cuminsonza» cun Lucia Alpiger ha liug mesjamna, ils 3 da settember 2025 allas 20.15 a Ruschein, Casa da scola Crestas, stanza 11. Dapli sin www.dacuminsonza.ch.